

# Malu di Boka i Pata

E dianan aki, hopi kos ta papiá tokante e enfermedat di animal “malu di boka i pata” (mond- en klauwzeer), kousá pa un víro hopi contagioso pa bestia. Baka, kabritu, karné i porko salú por kontagiá e enfermedat dor di kontakto ku bestianan infektá òf obhetonan ku nan a kontaminá dor di saliva, urina i sushi. Ma bientu, para, djaka, pushi i hopi otro bestia ku no ta keda afektá dor di e malesa por plama e víro tambe.

E enfermedat inkurabel ta produsí blar den boka i e tehido den pata i parti ariba di e huf. Bestianan infektá ta baba, haña keintura, kana ku difikultat i ta pèrdè peso rápidamente. E tambe ta afektá produkshon di lechi. E víro por afektá kurason di e bestia i kousa morto. Dies porshento di bestianan adulto por muri, ma e por mata 100% di animalnan mas yòn.

Pa prevení e malesa di plama, oropeonan ta mata miles di bestia. Na Gran Bretania e enfermedat a aparesé dia 20 di febrüari. Ya kaba tin 607 kaso konosí i ekspektativa ta ku e kantidat lo oumentá pa 4000 kaso pa luna di yùni. Komo resultado, e inglesnan ta mata ún mion animal i ta deshasí di nan den burakunan grandi kobá den tera. Segun nan kálkulo, e enfermedat lo kosta e pais \$12 biòn (pa kunukeronan, ménos turista, èts.). Na Irlandia, nan ta mata 40.000 baka, karné, porko, èts. Tambe a deskubrí bestianan infektá na Fransia i Hulanda.

Algun pais ta nenga importá karni for di Oropa. Tin pais ta desinfektá sapatu di pasaheronan ku ta yega di paisnan oropeo.

Ku malu di boka i pata tantu den notisia e dianan aki, mi no por keda sin nota e trato ku bestia infektá ta haña kompará ku e trato un persona ku un enfermedat contagioso ta risibí. Ta mata e bestia infektá...i huntu kun'é miles di otro animal ku potensial di keda infektá. I kiko ora hende tin un malesa contagioso? Ta laga mata e pashènt infektá pa un enfermedat inkurabel? Nunka! Alkontrario, dòkternan ta duna nan e mihó kuido.

Si evolushon ta bèrdat, si hende ta desendiente di bestia, anto hende no ta superior ku bestia. Hende ta solamente e bestia mas desaroyá. **Trato preferensial pa hende riba bestia ta inkonsis-tente ku e teoria di evolushon.** Si hende ta solamente un bestia mas sofistiká, anto e pober animal enfermo ta meresé e mihó trato médiko, meskos ku hende. Òf lo kontrario tambe ta bèrdat: si hende ta bestia mas atvansá, i ta mata animalnan infektá, anto **ta hustu pa ehikutá tur hende ku tin un enfermedat contagioso. Esei ta konsistente ku e teoria di evolushon!**

Ma unda evolushonistanan a keda? Pakiko no ta tende nan stèm? Dikon nan no ta manifestá kontra e masakre di tantu bestia? Pakiko nan no ta protestá kontra e trato preferensial ku hende ta haña?

Echu ta ku “malu di boka i pata” ta demonstrá bon kla ku e evolushonista no ta despuesto pa biba conforme ku su teoria. Si nan a ker'é di bèrdat, nan lo mester ta riba kayanan protestando na bos haltu kontra e masakrenan horíbel! Nan mester manifestá pro tratamentu médiko pa e pobesito bestianan.

Henter e episodio aki ta demonstrá un biaha mas ku **hende ta un kreashon spesial di Dios; ku Beibel, no evolushon, ta bèrdat. Dios a krea hende—hende so, ningun bestia—den Su mes imagen.** “*E ora ei Dios a bisa: “Laga Nos traha hende segun Nos imagen, conforme Nos semehansa; i laga nan goberná riba piskánan di laman i riba e parhanan di shelu i riba e bestianan di kria i riba henter e tera, i riba tur bestia ku ta lastra riba tera.” I Dios a krea hende segun Su mes imagen; segun e imagen di Dios El a krea hende; hòMBER i muhé El a krea nan*” (Génesis 1:26-27).

Un biaha mas, máskara ta kitá for di kara di e evolushonista pa nos mira ku evolushon ta un mentira. I e biaha aki, e máskara ta kitá dor di un pobersito animal ku malu di boka i pata.